

In mais da pais

Las lingias grassas e finas da l'october 2020

DA DAVID TRUTTMANN/FMR



La unda actuala d'infecziuns da corona è inquietanta. E co!

Schegea ch'ina segunda unda n'è en sasez nagut auter ch'in «déjà-vu». In'unda che vegn e guarda ora sco quella d'avant, sco l'emprima. E blers da quels «déjà-vus» scuntrain nus quests dis: persunal da tgira surdumandà, discussiuns per responsablads tranter chantuns e Confederaziun, live-streams cun Berset e Sommaruga, stabs da crisa che vegnan re-instalads, fatschentas che ston serrar, quarantinas, annullaziuns d'occurrenzas, ponderaziuns per in lockdown etc. Dasper tutta malsegirezza datti damai ina tschertezza: Undas vegnan e van insacura. Lain sperar.

Ina ferma unda feminina pudesan duvrar il mument las vischnancas en il Surmeir, sco la Pagina da Surmeir ha constatà quest mais. Dapi che las dunnas han il dretg da votar – dapi bunamain 50 onns – èn las dunnas fermamain sutrepresentadas en las suprastanzas communalas da la regiun. Ils gremis supremis da las vischnancas fusiunadas dad Alvra e Surses han actualmain ina quota da dunnas da 0 pertschient. «Zero points!» Per la paja ha Bravuogn-Filisur, in'otra vischnanca en la regiun, elegì avant paucs dis l'emprima donna insumma en sia suprastanza communal. Quai è schon bunamain ina revolta.

Ina bun'unda duvrassan il mument era las instituziuns linguistic-culturalas rumantschas. L'uniun tetgala Lia Rumantscha è numnadamain a la tschertga dad in secretari u dad ina secretaria, a la tschertga dad ina strategia ed a la tschertga dad in nov termin per la radunanza generala annullada quest mais. Sia uniun affiliada, l'Uniun dals Grischs, è vi da surlavurar ses statuts e vulesch midar il num, sco ch'ella ha discutà quest mais a sia radunanza. E l'Uniun Rumantscha Grischun Central tschertga ina persuna al timun da l'uniun, cunquai che la co-presidenta Zegna Pittet-Dosch ha demissionà. Ins pudess dir: Las bargas stattan airi amez la mar, senza chapitanis, senza compass, senza vent e senza undas.

Tut l'unda digitala dals davos mais ed onns para dad avoir fatg ina storta enturn la Val Medel. Però quai po perfin esser fitg simpatic. Pertge? – Quest mais ha in'enconuschenta setgentaria da charn medelina fatg reclama via inserat en gassetta. L'interpresa ha fatg attent lecturas e lecturs ch'ins possia empustar tar els buna charn setga – via telefon! Nagina homepage, nagin'adresa da mail – simplamain in numer da telefon fix da «081» da Curaglia. Quai merita il premi per il pli simpatic inserat dal mais, perquai ch'el mussa quant



ILLUSTRAZIUN JON BISCHOFF

simpel che la vita fiss atgnamain anc adina: Telefonai cun il corn!

L'Engiadina è siglida sin l'unda da Monopoly. Dapi dacurt datti il classicher da Monopoly er en ina versiun engiadinaisa. Or dal plaz il pli char dal gieu svizzer, «Zürich Paradeplatz», è daventà tar il Monopoly engiadinais la «Via Serlas» da San Murezzan, la via cun il Palace e las boutiques. Probabel n'è il gieu Monopoly anc mai vegni situà en in conturn uschè realistic sco ussa cun l'Engiadina: terren da bajegiar per pretschs exorbitants, speculaziuns, gangsters e milliunaris, bella prada verda per metter si chassetas ed hotels. Il Monopoly è finalmain arrivà a chasa.

Ina veritabla unda da success durant ils davos decennis ha gi l'Uorsin. Il cudesch d'uffants ha gi sia preschentaziun la fin d'october 1945, damai avant exact 75 onns. Da quel giubileum ha rapportà la FMR quest mais. La finamira numer 1 da Uorsin-superstar era gea stada dad avoir ina gronda plum-pa. Sia segunda finamira pli subli-

ma è però stada in'otra: stgatschar l'enviern cun il Chalandamarz. Ma sco che Chasper Pult, l'expert da Uorsin, ha scrit en ses artitgel da giubileum, ha Uorsin disditg cumpletmain cun questa segunda finamira: Ils 24 d'october 1945, il di da la preschentaziun dal cudesch Uorsin a Cuira, hai navi.

Questas ulteriuras lingias grassas e finas han bittà undas quest mais: La Punt Chamuesch ha stritgà il stritg tranter «Punt» e «Chamuesch», suenter in lung proceder da lubientschas. Donn ch'els n'han betg ponderà da remplazzar il stritgin cun in'unda.

Simon Jacomet, il tausendsassa da Surrein, è vi da crear in nov ski. Tenor la descripiun entusiastica da la redactura da la FMR è quel nov ski «extravagant, interessant, funcziunal, lev e special». I resta da sperar ch'i saja insumma pussaivel er dad ir cun skis cun quest apparat fenomenal.

En la Val Trupchun èn vegnids dumbrads quest onn damain tschiervs che auters onns durant il

temp da chalira/stgalmogna. Davart ils motivs po be vegnir speculà: Prendan ils tschiervs memia serius la distanza sociala?

Sin il Corvatsch datti ussa sin 3303 meters sur mar ina destillaria da whisky. Qua vegn endament be direct in verset tirolais: «Wenn dia Lait narrisch weardn, nor gebn sie a Zoachn!» – Per bun rumantsch: Cura che la gliעד cumenza a batter, alura dattan els in segn! Per exempel en furma d'ina destillaria sisum in piz.

In mais da pais

■ (fmr/dat) Tgeninas èn stadas las lingias grassas e finas dal mais passà en Rumantschia, en il Grischun ed insumma? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch Jon Bischoff il «Mais da pais» cun in «schurnal grafic».